

ZORNADE MONDIÂL DAL ZÛC 2019**Ancje la ARLeF in place par sostignî la culture dal zûc**

Sabide ai 25 di Mai des 4 aes 8 dopomisdì la Citât di Udin si jemple di zûcs e di ativitâts ludichis e sportivis par ducj i guscj e dutis lis etâts, par ricuardâ che zuiâ al fâs ben di tancj ponts di viste.

Ancje la **Agenzie Regjonâl pe Lenghe Furlane e sarâ presinte pe prime volte, sot de Loze dal Lionel**, presentant zûcs e leturis par fruts, fûr par fûr par furlan.

Il zûc al jude il svilup afetîf, cognitîf e sociâl dai fruts, ma ancje dai grancj. Il frut tal zûc al impare a jessi creatîf, a sperimentâ lis capacitâts cognitivis, a scuvierzi se stes, al jentre in relacion cun chei altris e duncje al svilupe a plen la sô personalitât. *“Cun di plui - al marche il **President de ARLeF Eros Cisilino** - il zûc al favorîs l'aprendiment des lenghis, come il furlan: ancje par chest motif, la Arlef, di simpri impegnade a sostignî la educazion plurilengâl dai fruts no podeve mancjâ a cheste manifestazion.”*

Sot de Loze dal Lionel i fruts, in graciis ancje de colaborazion de cjase Editore Kappa Vu, a podaran zuiâ cul **Memory di Gjat Ut**, il simpatic e innomenât personaç dai libris ilustrâts di Dorian Alessio e Deborah Crapiz, cul **Zûc de Ocje** par furlan, realizât di Otto D'Angelo e Marina Distefano pal Istitût Ladin Furlan e cul **Memory dai Mostriçs e Mostris** di Maddalena Bathish e Francesca Gregoricchio, fat di schedis e di un librut cu la storie di ogni personaç.

Chest ultin memory, jessût di pôc, al fasarà zuiâ i fruts cun 23 Mostris intîrs e a tocs, ancje cuntune ponte di pôre e cualchi sgrisul, massime cuant che a varan a ce fâ cul Mostri disot dal liet, o chel dai armârs o il Mostri des scarpis puçonis: chei, no perdonin!

Intant dai zûcs si fasaran ancje leturis, zûcs cui animâi e a saran in mostre ducj i materiâi plui resints de gnove editorie par fruts in lenghe furlane e di Maman! Cun di plui tancj materiâi promoziônai e informatîfs, ancje sui vantaçs de educazion plurilengâl, a disposizion des fameis e *gadgets* pai frutins che a zuiaran cu la Agenzie Regjonâl pe Lenghe Furlane!

Udin, ai 23 di mai dal 2019

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<